

REGIONAL NEWS BULLETIN

Date – 15/07/2025

Time - 7:30 Hrs

HEADLINES (MORNING)

1. Larsap General (Retd) Vijay Kumar Singh an raltlante tha taka chhinchhiah zel a tul a ti.
2. Chief Secretary, Chief Vigilance Officer ni bawk Pu Khilli Ram Meena hovin nimin khan Mizoram Anti-Corruption Bureau hotute an thukhawm.
3. Axion-4 mission hnuaia International Space Station tlawha zin Indian Astronaut Group Captain Shubhanshu Shukla leh a thawhpui mi pathumte vawiin hian leiah an lo let leh tawh dawn
4. External Affairs Minister Dr.S.Jaishankar chuan China nena ramria awm lui luangahte thawhdunna tha neih a tul thu a sawi.

<><><>

GOVERNOR

Larsap General (Retd) Vijay Kumar Singh an raltlante tha taka chhinchhiah zel a tul thu sawiin, Mizoram chu a hausak bik vak loh avangin nakin zela khawtlang leh ramah nghawng tha lo a thlen loh nan lo inpuahchak lawk a tul a ni, a ti

Larsap hian nimin khan Champhai District a tlawh a, Sawrkar Department hotute kawmin, he thu hi a sawi a, Champhai chu ramri kaltlanga drug tawlh rukna lian tak a nih thu leh drug hman sualin khawtlangah nghawng tha lo tak a thlen mek thu sawiin, drug do let kawngah tanrual a ngai a, a tawlhru thinte man chhuaha an phu tawh hremna pek zel a tul thu a sawi bawk.

Champhai District-ah PM-Kisan Samman Nidhi hamthatna dawngtu an tam chu lawmawm tiin, Farmer Producer Organization (FPO) tam zawk din a tul thu leh organic thlai tam zawk thar chhuak thei tura hmalak a tul thu a sawi a. Rooftop solar scheme, bawlhhlawh sawngbawl, thlai thar sawngbawl bakah hriselna kawnga scheme pawimawh tak tak - Ayushman Card, Jan Aushadhi leh Health & Wellness Centre-te chhawr tangkai thiam a tul thu leh, School leh Anganwadi-ahte eitur hrisel chauh sem a tul thu a sawi a. Khuarel chhianate'n nghawng nasa zawk a thlen loh nana invenlawk thiam a pawimawh thu sawiin, hmasawna hnathawh kawngah Sawrkar department-te chu thawhona (convergence) ngaipawimawh turin a chah bawk. Larsap in Champhai a tlawh chungchang kan corr report ngaithla ang.

<><><>

PRISON

Thla khat kalta chhung khan Central Jail atangin mi tang 3 an tlan chhuak a, tun thlengin tumah man an la ni lova, Prison Department a thawkte chuan tang tlan chhuah thin chhan hi tang vengtu in daih loh vang a nih ber thu an sawi.

Tun thla July ni 11, Zirtawpni zanlai khan Aizawl Central Jail atangin tang pahnih- Lianhmingthanga (kum 36), Thingsulthliah Hospital Area, POCSO case nei leh Malsawmdawnga (kum 28), Farkawn, ND&PS Act thubuai neite chu an tlanchhuak a, Police-te sawi danin Tang tlan chhuakte hian an awmna cell ceiling ti chhiain, an cell atangin an chhuak a, rizai hmawra rod kâwm an dah chu Jail hungna banga lawn liamna atan an hmang a ni. Tang tlanchhuakte hi Police ten ngawrh takin an zawng mek a ni. Hetihlai hian June ni 15 zan dar 10 vela blanket leh mau hmanga Central Jail bang hungnaa a lawn liam, Lalthawmthanga (kum 28), Zonuam Veng, Aizawl, ND&PS Act thubuai nei pawh tun thlengin man a la ni lo a ni.

Hriat theih chinah kumin chhung hian Central Jail atangin mi 10 an tlan chhuak tawh a, heng zinga mi 7 te hi man let leh an ni tawh a ni. Kan corr report lo ngaithla ang.

Akashvani Aizawl, Regional News Unit zawhna chhangin Prison Department- a thawkte chuan tang tlan chhuak an awmin, duty lai lakah inquiry lak thin a ni a, thil fel lo awm dan a zirin duty te chu suspend thin an ni a, hetihlai hian tun dinhmunah tumah suspend an awm rih lo tih an sawi a, jail tang tlan chhuah chhan hi tang vetu in daih loh vang a nih ber thu sawiin, Mizoram prison manual 2017-ah chuan tang vengtu, jail guarding duty pakhatin mi tang 6 an veng tur a nih lain, tun dinhmunah chuan mi pakhatin mi 200 bawr vel a ven thin avangin kil tin an veng seng vek thin lo an ti a ni. Hei bakah hian central jail leh a hungna te chu a tha tawk tawh lova, hei hian tlan chhuah a ti awlsam niin an sawi bawk a ni.

Mizorama Jail hrang hrangte hi SASCI hnuaiah sak mek an ni a, tun dinhmunah Central Jail chauh thuam that a la ni rih lo a ni.

<><><>

CS

Chief Secretary, Chief Vigilance Officer ni bawk Pu Khilli Ram Meena hovin nimin khan Mizoram Anti-Corruption Bureau hotute chu Chief Secretary Conference Hall, MINECO-ah an thukhawm a, Mizorama ACB hnathawh kal mekte leh tun hnaia ACB hmasawna leh hmalakna hrang hrangte an sawi ho.

Chief Secretary chuan ACB Staff-te hnathawh chu fakawm a tih thu leh a thlawp tlat thu sawiin, tan la thar zel turin a fuih a, ram dan leh dunte uluk taka zir chianga, corruption dona kawnga theihtawp chhuah zui zel turin a chah a ni.

Pu Lalbiakkila, Sr SP ACB report pek danin tun dinhmunah Mizoram ACB-te hian Case chhui lai 12 leh Preliminary enquiry tih mek 13 an nei a, kum 2025 bikah hian regular case 4 chhui zo tawhin Preliminary enquiry chhui zawh tawh 7 an nei tawh bawk a ni.

<><><>

NASHA MUKT BHARAT ABHIYAAN

Sorkar laipui hmalakna hnuaia ram pum huapa ruihhlo do beihpui thlakna, Nasha Mukht Bharat Abhiyaan hnuaiah Mizorama hmun hrang hrangah hmalak mek a ni.

Akashvani Regional News Unit, Aizawl zawhna chhangin Department of Social Welfare hnuaia Mizoram Social Defence and Rehabilitation Board-a Field staff Pu Lalrindika chuan Nasha Mukht Bharat Abhiyaan hnuaia hmalakna chu a that em avangin hmalakna tur district huang zauh belh zel niin nikumah chuan Mizoram district 11 telh a ni tawh a ti a. Mizoramah chuan Nasha Mukht Bharat Abhiyaan hnuaiah hian District Commissioner tinte te chu Chairman an ni a, an hmalakna hnuaiah Committee peng hrang hrang din niin, damdawi zuarte hnena school naupang kum tling lote hnenah damdawi hralh lo tura hrilhtu - sub-committee on task group, Mizorama kohhran hrang hrangte hnena ruihhlo chungchanga zirtirna petu, sub-committee on churches, sub-committee on school and colleges hnuaiah Aizawl district ah college 10 thlang chhuakin ruihhlo that loh zia inzirtirna te neih thin niin, zirlaite zirna tibuai lovin Anti Drugs Club - ralvengtu pawl din a ni a ti.

Pu Lalrindika chuan Social Welfare Dept hmalakna hnuaiah Home hrang hrangah tanpuina te an pe chhuak a ti a, Outreach and Dropping Centre, Chaltlang ah Doctor, Nurse leh Counsellor te enkawl na hnuaiah a thlawnin ruihhlo ngaite enkawl na leh kawmna hmun an nei tih a sawi bawk a ni.

<><><>

MISS GRAND INDIA 1ST RUNNER UP

Miss Grand India 2025 intihsiakna ah Mizoram aiawha tel kum 23-mi Vanlalnuntluangi, Thuampui, Aizawl chu pahnihna a ni.

Akashvani Aizawl Regional News Unit zawhna chhangin, Vanlalnuntluangi chuan a dinhmun chu Pathian tan a hlan thu leh Pathian ropuinan chauh a ni a ti a, a zinkawng chu Mizo mipui te nena zawh an ni a ti.

Vanlalnuntluangi Manager Amos MS Dawngkima chuan Miss Grand India 2025 thlannaah Vanlalnuntluangi hi eng pawl mahin an tirh ni lovin ama mimala tel a ni a ti a, kumin April ni 11 khan online kaltlangin audition ah a tel a, audition a paltlang hnu hian Mizorama Beauty Pageant lama tawnhriat nei tawh hrang hrang be pawpin Team a din a, tun thla July ni 3 atang khan Rajasthan khawpui Jaipur panin, inelna hrang hrang bakah grooming leh personal interview te neih leh a ni a tt a ni. Inrinni khan National Costume, Swimsuit leh Evening Gown hmangin inelna neih leh niin, a tuk zana a hmawr bawkna, Grand Finale neih leh a ni a, a tha zual 12 thlan chhuah te chu zawhna leh chhanna, Question and Answer round hmangin an inel leh a, Miss Grand India 2025 1st Runner Up ah thlan a ni a, Subtitle pahnih- Best Swimsuit leh Miss Social Media Queen a dawng bawk a ni.

Vanlalnuntluangi hi kum 2023 khan Mizoram University Miss Varsity ah thlan a lo ni tawh a, tunah hian Holy Cross School ah English Teacher hna a thawk mek a, Nilaini khian Mizoramah a lo haw dawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Vawiin chawhnu dar 2 leh a chanve-ah Chanchinthar puan leh a ni ang.

<><><>

AXIOM-4

Axion-4 mission hnuaia International Space Station tlawha zin Indian Astronaut Group Captain Shubhanshu Shukla leh a thawhpui mi pathumte vawiin hian leiah an lo let leh tawh dawn. Thudawn danin India sanaa chawhnu dar 3 ah California tuipui kamah an rawn tum dawn a. Nimin chawhnu khan ISS atangin hlawhtling takin an rawn inkap chhuak thei niin SpaceX chuan a sawi..

<><><>

EA M

External Affairs Minister Dr.S.Jaishankar chuan China nena ramria awm lui luangahte thawhdunna tha neih a tul thu a sawi. Dr Jaishankara hian nimin khan China Foreign Minister Wang Yi chu Beijing ah kawmin China lam atanga hydrological data tihchhuah chhunzawm theih a duh thu a sawi a. Eibar zawinna kawngah harsatna awm leh inkhuahkhirhna thenkhat tihtawp a tul thu a sawi a ni. Hei bakah hian External Affairs minister chuan ramria remna leh muanna avanga thil tha tam tak lo thleng te a tarlang bawk a ni.

Nimin vek khan External Affairs Minister Dr.S.Jaishankara chuan China Vice President Han Zheng hmuin khawvel dinhmun dethawng tak karah India leh China ten an ngaihdan leh thlirna inhawng taka an sawidun a pawimawh thu a sawi a. Ram pahnih inkara inlaichinna awm chu vawnnun a pawimawh thu sawiin hei hian rah tha tak a chhuah dawn a ni a ti.

<><><>

SYRIA

Syria chhimlama pawl pahnih inbeihnaah mi 89 an thi tawh a, mi 200 chuangin hliam an tuar. Thudawn danin ni hnih chhung chu ralthuam keng Druze ho leh Bedouin tlangmite Sweida Provnce ah nasa takin an inbei tawh a. Syrian Observatory for Human Rigths chuan inremna siam tuam hmalak ni mahse nasa takin an inbei chhunzawm zel nia thudawn a ni.

<><><>